

四庫全書

集部

欽定四庫全書

至正集卷七十七

元許有壬撰

公移

正始十事

竊謂春秋王即位大一統而謹始也蓋為政莫大於謹始未有不正其始而能善其終者也欽惟今上皇帝以聖神之姿嗣大厯服凡在有生孰不忭躍思見一新之

治夫繼政之間聖聖相承帖然無事猶必厲精更始思有以聳動天下之視聽況處大變之後者乎自非舉綱撮要因事制宜則必迂緩不切何補於治卑職忝當言路不敢煩瑣謹以十事切於新政者具列於後

一曰傳翼太子蓋聞太子天下之本擇人傳翼實有國之急先務也賈誼謂選天下之端士使與太子居處出入生而見正事聞正言行正道左右前後皆正人不能毋正又曰太子之善在於早諭教夫心未濫而先諭教

則化易成此古今不易之至論而治安長久之上策欽
惟今上皇帝春秋鼎盛萬年發軔之始天地祖宗社稷
之佑太子金玉美質天性聰明泰山磐石之基也當此
嗜欲未開心術未定之時首宜選擇正人端士以傳翼
之教之以祖宗寶訓并漢人文書使知創業之艱難治
亂之成迹培養德業習與性成則本一正而天下定矣
二曰選擇長官蓋聞家之隆替在於主家之人官之廢
興係乎長官之責如中書之總機務樞密之握軍政臺

憲之司風紀為之責者可謂重矣當於蒙古人內選擇老成歷鍊敦厚公忠者用之苟得其人又宜久於其任責之以必成則天下之事庶乎有濟世祖皇帝時為臺省官有終其身者故當時之治視古無愧其六部二品衙門行省行臺宣司為首官員俱合一體委任雖然此特末耳請以其本言之國家每用大臣未嘗不難其人蓋以儲蓄培養之無素也深山之木必參天而後勝大厦之棟梁此豈一朝一夕之所致哉若急於用而以拱

把之木為之不惟摧折不堪而傾覆被害者多矣培養之道無他在乎學校而已世祖皇帝用許魯齋為國子先生當時蒙古生員教育成材者何限至於集賢鷹房皆知所謂三綱五常今之學者不過粗識文字又復廢之使乳臭之子驟膺重任禮義廉恥視為何物惟欲保其富貴又安知君臣之義墮事隕身乃其宜也今後擬合令蒙古人員子孫弟姪必須入學培養教育使之有成而後量材授職他日必有出類拔萃之才出為國家之

大用其至下者亦必知君臣之義此似迂而實切於事者也

三曰宮禁通籍蓋聞千金之子坐不垂堂萬乘之尊宜宜無備故深居九重宮室宿衛嚴肅周密者蓋以預備非常為祖宗社稷萬年計也周官小宰治宮禁之法而刑統闡入罪有等差我朝立國寬厚相承凡有朝賀雖臧獲之徒皆得直至廊廡縱觀行禮平居無事大臣奏對之時親隨吏卒皆得入內雖恢洪無外大示寬容而

小人何知不可不謹其司門禁者惟視衣服之美惡而
出入之朝士惡衣捶楚交下卒隸鮮服往来自如貴賤
無分一至如此且禁之為言禁也禁人而使之不得至
也今一切不禁而禁衛之設果何為哉擬合截日令省
部約會合平衙門參酌漢唐之制立通籍之法其於事
體關係最重

四曰削去兼領軍職蓋聞總攬威權乃人主之事臣下
責任豈宜使之有出位過分者故太平則注意宰相有

事則責成將帥世祖皇帝立中書省以總機務立樞密院以治軍旅治民者不與兵事治兵者不與民事其所以防閑之道截然有不可犯者邇來漸至紊亂如元惡特實既為臺端又領軍衛雖包藏禍心固不易測而恃威藉權實由乎此常人之情手有鞭杖則思箠擊無是物則無是心也又如欲擊人者空拳赤體雖欲奮作人得以制一旦被之以鎧甲授之以兵仗則無所不至矣擬合照勘各衙門官員凡兼軍職領各衛者皆與削去

以消奸宄於未萌且為無知小人之福

五曰太平武備蓋聞有文事者必有武備又曰有備無患夫天下之患莫大於無備山居有虎狼之患則高其垣墉富家有盜賊之患則堅其扃鑰而況為天下者乎備之之道若治兵爾夫折衝禦武使四海為一兆億晏然雖大奸雄不敢輕發者獨係乎此而已承平日久恃其無用卒日以惰將日以鈍將帥襲其父祖舊部例皆膏粱乳臭之子聲色是務腴剝是習至有不能挽弓者士

卒非老病則幼弱非影蔽則催代器仗之顛倒不知況
所謂搏鬪擊刺之法其軍戶消乏鄂囉官不知存恤管
軍官日復侵削困苦疲弊無以供軍需應屯戍者滔滔
皆是也天下無事則已一旦或用則何以哉擬合令樞
密院講究拯治教習之法先自五衛次及天下屯戍去
處必使官知調度士知戰鬪不可因無鼠而養不捕之
猫此太平之先務也

六曰逆賊妻妾蓋聞有非常之變必有非常之法治之

比者元惡諸賊蒙朝廷恩寵雖海獄不足以喻其高深而集賽之設又腹心股肱倚托無疑者一旦如此赤其九族未足以雪天下忿怒之萬一欽惟今上皇帝奮雷霆之斷盡殲梟獍襁褓之子殄滅無遺京師萬民鼓舞忭躍但各賊妻妾尚未區處各賊存日同享富貴其夫所犯蓋歷代之所未聞天地人鬼之所共怒不以非常之法治之譬猶被萬斤重物之擊而以寸莛報之擬合將同謀諸賊妻妾一體論罪或流竄遠方分配流囚其

諸人索要為妻仍享富貴一旦又遇禍變視夫家如傳舍狙翫誅戮恬然自安使綱常掃地痛宜禁止索者奏者俱坐以罪庶幾刑罰輕重適宜

七曰頒詔以正前赦蓋聞令出惟行不惟反此常道也不得已而處天下之變必欲泥於古而蔽於常則亦不通之甚矣比者各賊惡逆傳聞四方震駭物聽既而詔告天下除殺祖父父母妻妾殺夫不赦外其餘如謀反大逆奴婢殺主皆與釋免百姓聞之不得不為之疑

也豈知各賊雄據兩都或握兵權或操省印或在憲臺
布滿要地號令百姓乘輿遠在數千里外朝廷一有輕
舉則居庸之關不守矣當時危急之勢易於反掌雖惡
逆授首在理可必而兩都生靈先肝腦塗地矣聖上沈
機遠謀宸斷有待不欲輕發貽害百姓故以寬恩而釋
其疑使惡逆之徒有以自安不至狂肆或生他變及神
機之發誅殛元惡特煩一介之使爾此自古聖王之所
不及也然而先行詔書已徧四方百姓不知將謂謀反

大逆奴婢殺主皆可僞幸獲免擬合再詔天下使知惡逆之授首以大慰衆心其有謀反大逆奴婢殺主者亦合復追入禁為萬世綱常之助

八曰特們德爾家產蓋聞刑賞者人主之大柄有國盛衰之所由也近籍沒特們德爾家產生前所授諸王各人等鈔物金銀不可勝數其為奸惡不待縷陳姑以刑賞大節論之其殺實勒們伊勒哲伯當其罪者矜夸為功至於拜珠多爾濟賀巴延天下皆知其無罪盜弄威

權致之必死監察御史索約勒哈迪默色觀音保李謙
亨成珪雖以言事忤旨而其子索諾木為治書觀音保
又嘗發其劉司徒事是以父子表裏媒孽使四人竟坐
誅竄則嫁怨於上又復陰黨逆賊特實致先帝暴崩皆
特們德爾為之張本也近奉聖旨免其抄籍聖上厲精
圖治之初刑賞大節尤當得宜擬合依舊斷沒其諸子
家產先因事發獲免之後分張別居足見預為三穴之
計合依哈克繖子例一體籍沒仍將家屬遷發遠方以

謝天下

九曰籍沒以補經費竊謂臣下奸邪既正誅戮閭閻疾苦首宜講求邇者巨貪宿惡以次誅鋤籍沒其家動以萬計是為蒙蔽奏請無補經費監察御史建言明立卷冊撥付省部以助經費果有特奉賞賜經由中書明白奏稟然後放支欽蒙允許近為特們德爾惡跡敗露籍沒其家本人之惡蓋不待言其家人之富又天下之所共知者雲南吐蕃之殺奪中書宣政之掊克賣官鬻獄

濫賞冒支其目雖多無非朘剥生民膏血而致之者因是而行惠民之道是亦惠而不費者也聖朝富有四海豈待區區鹽價方得豐裕舊價每引添至

闕

已極矣本人要功言利再添一定致令其價翔湧百姓一日而不可無者坐令艱食鹽課因而恢辦不前又江南無地人戶科著包銀每戶額納二兩折至元鈔十貫雖曰驗各家物力品答均科解庫鋪席殷實之家固不為無而貧下小戶何可勝數所開鋪席本錢有不及

一定半定者例以無田地有營運科約實為不堪至治三年之數欽蒙免徵而其額故在特們德爾及諸子并已籍沒實勒們伊勒哲伯哈魯哈克繖實壘伊呼雅阿扎爾巴哈等家產又至大四年三月十八日至今應係賞賜臣下斷沒錢物田土房屋人口盡追還官計其總數共有若干撥付省部收掌却將特們德爾續添鹽課硃科包銀放罷不惟民力少蘇又且各處鹽課易辦昔梁冀敗收其財貨減天下稅租之半散其苑囿以業窮民

古今稱美今化瑟更張之時天下方拭目以待此其大者也

十曰樽節無益之費蓋聞去奢崇儉乃能化民節用愛人
可以裕國朝廷之於財用蓋一日而不可闕者雖自古
極治之世亦莫非取之於民但取之有道量入為出
故國無匱乏民無疲困中統至元之初南供大軍之需
北給防守之費方且廩有餘粟帑有餘財江南既平江
淮之財用庫藏之蓄積暴露於外未聞一毫無功之賞

一錢不當之費至大以來賞賜不貲造作不節與夫其餘一切蠹財之事不可枚舉而經費始有不足之患矣故累年以來每以錢糧不敷為患益求所以生財之道至於囊括繭絲不遺毫髮亦復不足者何哉特用之不節耳民惟邦本本固邦寧財用不節害必及民聖上踐阼之始當近年多費之餘承其弊而革之詔告天下但凡係官工役造作停罷此蠹財之尤者而先去之得節用之大者矣天下生民不勝幸甚宜令中書省講究凡

如造作之蠹財者皆明白條具逐項撙節依世祖皇帝用財之道則四海家給人足此新政之最切者也

辭治書兼侍書學士咨文

卑職學非出類才不兼人補報每慊於初心叨冒敢過於素分中臺承乏已懼不勝禁籞執經益無所取惟揣度之自審故去取之輒陳編簡前言或許細微之掇拾冰霜要地難容迂懦之因循如蒙止供侍書之職庶免瘵曠之責

同王左丞請代咨文

嘗聞佐天子理陰陽中書實機務之本列庶位招俊乂
執政須才德之人非天下之所共推則公議恐未盡愜
當惟某等才疎學淺德薄望輕偶際明時誤承重任或
叨承弼於兩府或昌參贊於歷年雖竭力致身冀涓埃
之有報而鞭撻操鈍終致治之無裨比者災異沴臻黔
黎告困究其責任首在漢人既莫亮於天工又久妨於
賢路尚茲保祿豈止汗顏宜從都省間奏選人替代放

歸田里公道幸甚



至正集卷七十七

欽定四庫全書

集部

至正集卷

七十八至
八十一

詳校官編修_臣錢樾

侍讀_臣孫球覆勘

總校官降調編修_臣倉聖脉

校對官中書_臣潘曾起

謄錄監生_臣周範衍

欽定四庫全書

至正集卷七十八

元許有壬撰

樂府

水調歌頭

題蕭獨清山水勝處

山水據全勝消得獨清人
神仙定在何處此處可尋真
山有蓬萊氣象水有瀛州風物
人是葛天民翫得紫芝
老吟盡碧桃春
四時花千日酒一溪雲
回頭下望濁

世無地不紅塵憶昔乘輶江右目斷丹霞翠壁底事走
跋跋今日送君語聊為自移文

二

胭脂井次湯
碧山教授韻

它山一卷石何意效時粧天生偶然斑駁蘭麝不能香
甃作陳家宮井澆出後庭玉樹直使國俱亡故邑久皆
廢陳迹草茫茫嘆人間才璇室又阿房麗華鬢髮如
鑑魯此笑相將一旦江山瓶陸猶欲夫妻同穴甚矣色
成荒五色補天缺萬世仰媧皇

三

卽席贈河南
廉使高辛甫

徒陽記同署三十四年過朝臺暮省蹤跡贏得鬢雙皤
相別又逾一紀百歲都能幾見塵事日蹉跎今夕復何
夕旌節照山阿笑年來洹水上試魚簑迂踈久厭城
市其奈故人何浩蕩雲山烟水寥落晨星霜木如子已
無多邂逅一樽酒忍負醉時歌

四

和鄭彥
章韻

春來久無雨都作艷陽天天公素念民事其忍穢良田

鞭起九淵濃睡散作兩間膏澤生意發天然聽得老農
語大有是今年 玉堂深金闕近亂雲烟乾坤放眼無
際何物不鮮妍休把聖功收斂要使人心滿慰萬事此
為先我老歸農好宜買潞河船

沁園春

送鄉人高子
翔次來韻

放眼蕪城北盡淮堧東馳海門歎故園遙隔關山岐路
好懷深負風月乾坤邂逅佳人笑談清致所見而今勝
所聞江湖樂任提鷗挈鷺翳鳳騎麟 世間富貴浮雲

也莫校箕山與渭濱想抱關擊柝心期賢聖耕田鑿井
上有華歆休道官卑休嫌俸少且喜詩成句句新君歸
矣問故園桃李幾度青春

二

寄題詹事丞張希孟韓
然亭用王繼學參議韻

俯仰乾坤傲睨羲皇優游快哉看平湖秋碧淨隨天去
亂峯烟翠飛入窻來鴻鵠翱翔雲霄寥廓斥鷃蓬蒿莫
見猜門常閉怕等閒踏破滿院蒼苔 人間暮省朝臺
奈烏兔堂堂挽不回愛小軒月落夢驚風竹空江歲晚

詩到寒梅兩鬢清
霜一襟豪氣舉世相知獨此杯
京華客問九街何處堪避風埃

三

次希孟韻名至通州以病歸時齋
唐事丞亦堅卧不出因并呈之

坎止流行行止非
人何勞用心羨
枝巢居士泥塗軒冕
時齋老子城市山林
富貴何常榮枯遞轉
惟有高名不陸沉
他休問只清風一榻
多少黃金神仙方外
難尋更可笑牛山
泪滿襟且清尊素琴
半庭花影芒鞋竹杖
十里松陰歸去成辭
閒居留賦梁父安能
抱膝吟迷途者

聽雲間高唱誰嗣鴻音

四 壽可行弟次
其見壽韻

天相吾家篋笥無金詩書有人看發揮
胷臆辭鋒凜凜薰陶氣質韋佩申申
師友淵源賢才衡鑑胷館光華近
帝宸男兒事便盡輸心力難報君親
讀書第一當勤只孝弟書中是大倫
況人生為學百年在幼田家得計
一歲惟春科占龍頭名高鴈序好
與皇家作鳳麟都休問是地鍾河
嶽天應星辰

五

壽同館虎賁百
夫長鄧仁甫

十載炎方同飲江漢同為轉蓬恨尋常會面當年無分
三千餘里此地相逢宇宙英奇幽并慷慨肯事區區筆
硯中男兒志要長鎗大劒談笑成功 轅門醉卧秋風
看落日旌旗掩映紅愛朔雲邊雪一聲寒角平沙細草
幾點飛鴻湖海情懷金蘭義氣莫惜瓊杯到手空君知
否怕明朝回首渭北江東

六

次班彥
功韻

旅食京華蜀道天難邯鄲夢回笑白衣蒼狗悠悠無定
黃塵赤日擾擾何為長缺休彈瑤琴時鼓倦鳥誰教強
去來衡門下幸良辰良友同酒同詩功名少壯為期
奈身外升沉自不知算人間難得還丹大藥山中儘有
老樹清溪蕙帳雲空石田苔滿應被山靈怪去遲春來
也向故園回首歸去休迷

七

弱冠離家浪走人間餘三十年奈救時才短虛塵政府

讀書功少深負經筵風月西清冰霜柏署一歲中間漫
幾遷君恩重便不教覆餗直許歸田 豐碑高表洵阡
又飛上吳頭萬里船把家傳圖史拂除塵蠹舊栽松竹
收貯雲烟大別嵯峨鵲逢縹緲盡在先生几案前閒人
事但登樓小酌閉戶高眠

八

老子當年壯志凌雲魏科起家被塵囂拂耳塵成重聽
簿書眯眼攻作昏花天上歸來山中絕倒部曲黃牛鼓

吹蛙閒官好判園丁牧豎一日三衙平生幾度天涯
恰艤住飄飄泛海槎向竹林苔徑時來教鶴山泉石鼎
自為烹茶庭下花開樓頭雨霽儘著春風笑鬢華功名
事問西山爽氣多少烟霞

九

飛吟亭和
白玉蟾韻

少日飛騰湖海奇曾風雲壯圖把人間遠道看為咫尺
眼前實地認作虛無釀酒中天振衣千仞塵世烟霞有
幾區君山下見洞庭清淺欲問麻姑故吾只是今吾

已深愧當年大丈夫
悵川流不息真如逝者天風高舉更有誰歟
鼎鼎何功江山多幸長缺歸來食有魚神仙
事笑臨邛道士還在洪都

十

次張孟功韻

擊楫中流躍馬長途今非向年嘆故人萬里江東渭北
流光幾度鴈後花前鬢影星星人情落落恰念蘇家
負郭田空惆悵負清泉白石布韞行纏壺中浩蕩瑤天
問清濁何須較聖賢想塵埃狂走難逢一笑扶搖直上

且任孤騫飯有魚羹儲無甌石何必千金學計然君知
否但東山醜婦也自嬋娟

十一

次王仲武
為壽韻

彼壽而康鴈自能鳴樗還不材且光華老景春風秋月
消磨舊夢暮省朝臺倚伏相尋窮通素定軒冕於人果
儻來神仙遠有桃花流水便到天台 雲林都是親栽
幸登覽猶能矍鑠哉但携琴載酒時時遊戲逢山見竹
處處安排諫議無功催科無政爛醉何妨卧客懷承平

日看英才用世多少臺萊

十二

賦鶴奴次
馬明初韻

頂有丹砂服具玄明云胡作奴想風霜搏擊不如一鶚
雲霄變化復愧雙鳬爾雅無名山經不志多識慚予問
學孤今知汝肯自為卑下甘事勤劬 鱗奴魚婢然乎
笑多士文人善矯誣愛汝從仙侶每能謙抑日陪食飲
惟取殘餘赤壁飛來雲龍放去守舍應門屬眇軀無多
語似王家便了有約休渝

十三

賦 酪次
明初韻

有物龐然乃牝而犁山川舍諸為老饕營口因踈黃稚
平心酬德忍急青芻方丈無功萬錢增害茹飲方將效
穴居桃林媪幸日輸甘漣香泛流酥 老饕笑問長鬚
汝今似桐官不是奴更題封誰調聰明德祖和漿且浣
消渴相如火候沖融春膏濃結常遣韋囊似瓠壺將軍
腹問果誰相負吾欲明書

十四

臨清舟中即席次
韓伯高見贈韻

草木無情不問寒暄開時便開只黃花多事偏憐隱逸
白頭何補願避賢才老友相逢清談絕倒休校劉郎去
後栽尊中物勝它年千里漫寄寒梅 神仙合住蓬萊奈
老去思兒忍不回任耿莊槐老休為癡夢梅家酒熟且
浣愁懷渭北江東暮雲春樹何日扁舟更此來公知
不便連朝觴詠能幾徘徊

木蘭花慢

秦淮次湯碧
山教授韻

問東來何處控吳越壯江淮愛十里縈紆水雲圖畫鼓

吹風雷回頭下臨無地盡朱樓迢遞倚天開酒旆高懸
別浦繡簾低拂長桅踈狂常與世情乖勝地却須來
漫懷古長歌後庭花落斜日潮回傷心舊時明月照淒
涼亡國恨無涯為問水邊鷗鷺人間幾夢庭槐

二

至大戊申八月廿五日同踈仙萬戶游城南廬
圓園甲京師主人野雲左丞未老休致指清露
堂扁命予二人分賦長短句予得清字皆即席
成章喜甚勝之踈仙其甥也後更號酸齋云

渺西風天地拂吟袖出重城正秋滿名園松枯石潤竹
瘦霜清扁舟采菱歌斷但一泓寒碧畫橋平放眼奇觀

臺上太行飛入簷楹 主人聲利一毫輕愛客見高情
便焚剝驪珠蓮分冰繭酒注金瓶風流故家文獻况登
高能賦有諸甥清露堂前好月多應喜我留名

三

次韻馬廷
彦山居

羨山人結屋腰碧澗面丹崖問桂有餘香槐多擁翠誰
種誰栽幾年力田勤學是慶源先世有人開樂地夏弦
春誦浮雲暮省朝臺 半生奔走負山齋何地不塵埃
歎老病才歸鄉隣幸恕不忍擠排白眉故人多事似東

門偏更道賢哉但有黃雞白酒老夫不倦頻來

四

次韻薛壽夫見寄

笑余生多癖非酒病即書囚任世態翻騰亥訛成豕沈
變為尤中條有亭無恙論三休吾更早宜休方外青山
故在鏡中白髮新收天風鏘佩下瓊樓心事付東流
向一壑雲深三年夢熟八表神遊淵明苦無多語只高
標千古邈難儔老子新銜自署醉鄉談笑封侯

五

和社德常中秋韻

歎流光如水又分破一年秋奈妬雨癡雲良宵佳節不
遂登樓山川滿前圖畫幸故鄉無復有新愁風物催成
老境乾坤付與雙眸幾年京國苦淹留今得賦歸休
況天柱峯頭清輝好在氛翳俱收身閒更逢全景是腰
錢騎鶴上揚州明日霜天紅樹絕勝蘆葉汀洲

六

次白公嚴
為壽韻

記青年充賦曾射策對嚴宸便暮省朝臺才離筦轄又
掌絲綸狂愚豈勝時用幸扁舟歸去早知津一任無錢使

鬼猶能有筆通神 交遊萍水百年身
襟袂幾回分 正雪後花前江東渭北
嗟我懷人 澶淵召棠成頌 肯推
揚餘韻 頌莊椿老矣甘心伏櫪
天衢行看翔麟

七

和鄭彥章暮
春即事韻

問東君何意來幾日便言歸
悵衰病襟懷 嬾妍景物正
欲相依 狂風不知人苦遣
萬紅千紫一時飛却見楊花
才思閒來縈絆晴暉 可人應
試紵羅衣 底事鴈書稀
望故里關河雲林杳 靄烟水
霏微多情已無聊賴更扁

舟孤負鰈魚肥想見洄溪松竹綠陰籠滿苔磯

六州頭歌

次馬明初韻書所見

軒昂仙侶風度似吾儕凡鳥輩雖累百總輿臺敢偕偕
何處風絲客昧平昔恣睢突形迹異天壤隔遽相排老
眼渾如無見雲霄遠未便時乖笑朱鰲肆螯自喪亦多
哉我出塵埃浩無涯有傍觀者同氣類公好惡挺身
來行不義宜自斃坐虺頽任奸回萬事如翻手吾方此
外形骸來汝鶴吾有語汝無哀誰遣乘軒烜赫令此

輦眼不能開付恩讐一笑漫且咏萼苔休面三槐

二
次明初
為壽韻

避賢解組三見太行秋慙畫錦猶遠勝敝貂裘翫滄州
霜水清如玉窮霄壤忘物我恢幃塞無牖戶底綢繆自
笑平生事業如今日頗善為謀有靜中至樂何處更天
游已分淹留醉鄉侯有江湖客翰墨友凌元白壓曹
劉論文暇陪杖屨事觥籌共藏修世態誰能校輕骭
重伊優吾有政鋤藥圃治瓜疇說與愚夫樵叟既相

好豈但相猶任多言莫及野渡有孤舟天地沙鷗

蘭陵王

賦古劍用
吉善甫韻

昆吾鐵神物十年不滅時出匣搖蕩碧空閃閃寒芒電
光掣細看時是巨闕三尺斜明隙月新豐旅憚爾醉歌
也勝毛錐校平側沈埋土花碧向堅石寒泉重礪霜
雪一天星斗昏無色因起舞為樂崆峒試倚螭魅膽寒
石自裂免豐獄羈紲勲業幾英傑是曾馘奸邪腥漬
餘血方今四海邊塵絕佩服處閒伴金魚寶玦只愁靈

化雷雨暗水雲國

至正集卷七十八

欽定四庫全書

至正集卷七十九

元 許有壬 撰

樂府

摸魚子

鳳凰臺次湯
碧山教授韻

自蕭韶九成來後岐山猶是隆古羸顛劉源相枕藉幾
度狸號鼯舞堪笑處又巖爾鍾山一霎神光吐鶴汀鳬
渚問吳德何徵紫霄輕下天意竟誰許江山好老子

狂吟箕踞十年考信無據多情只有秦淮月還照故宮
焦土昏復曙浸寒暑悠悠老盡梧桐樹從今計取阿閣
成巢朝陽應瑞椽筆為君賦

二

中都餞荀平叔
都事赴大都

正荒寒似逃空谷佳人又話離別風低白草天無際漠
漠平沙如雪心欲折看落日飛鴻一線明還滅長歌激
烈把湖海襟期關山風物取次付彈鋏 毛錐子千古
鑽妍搜剋誰知更比鳩拙仲宣不作登樓賦間殺一天

秋色珊瑚佩，羨公去鳴騶。醉上長安陌，予懷轉結怕。紫塞寒深碧，雲暮合酒醒。見明月。

三登洞庭廟連天樓和劉光遠作

問樓頭幾多烟景，長風千里吹送。洞庭島嶼留殘雪，依約玉龍飛動。天故縱。要老子南來添得詩囊重。遙山翠聳更淡淡。斜陽蕭蕭落木，感慨古今共。人間世何處。祥麟威鳳繁華一枕春夢。江湖無限閒風月，待我往來吟弄。君莫痛看起舞紛紛，踏破中霄甕。深杯自捧，便喚

起湘纍汨羅江上沉醉是奇供

四

賦王簪用
明初韻

笑人間珪袞何物此華良貴天與倚闌瘦立亭亭玉刻
畫一生清苦人有語道不出監田豈是真才具山人告
汝正蓬鬢蕭疎不勝冠冕真者亦投去 洹溪水洗盡
眼中塵土天葩靜看齊吐冰壺涼月天如水塵柄肯論
夷甫翁醉舞任最爾寰區共訝山中許搔風沐雨且受
用清香古今多少富貴草頭露

五

賦鷄冠花
用明初韻

笑山人木鷄心事年來歛
嘴藏距幽花細草聊娛目
小圃更無閒土膏澤溥豈
天為司晨偏與鍾奇古無
人起舞對寂寂園池蕭蕭
風雨竦立為誰怒 三生夢
猶繞戶鄉樓處昂然幾欲
掀舉按丹甍錦頭顧好葉
葉舊時毛羽天已許待海
日升時飛上桃都樹人間
凝佇看吐白東方却來平
地千載不容腐

六

次明初
為壽韻

筭驅馳三十餘歲只將光景虛度野雲本是無心物辦
得幾多霖雨還自許量綿力擁才猶可松筠主天方見
與把村落溪山風煙朝夕著在最佳處 青年志萬一
容裨當宁何慙與贈為伍歸來千仞岡頭看却笑瓊天
飛舞方學圃要摘我田蔬共和淵明句說說醉語道咫
尺重陽登高落帽休競汨羅渡

七 次郭子敬祭酒
同賞牡丹韻

記花王舊時名品共傳姚魏黃紫洛陽種治雄天下何日

移根來此青鏡裏任淡抹濃粧莫挽春衫比人間四美
更天遣舒郎等閒一賦千載共心醉清平調漫與東
風料理繁華能擾天紀沉香亭上無人恨流入錦江春
水安故里又何似吾儕聊復尊壘耳清歌且止怕檀板
無知多嬌不耐驚得絳雲起

八

涇堂盆池紅白蓮開余適卧病城居六月一日
始往一觀落者雖多開者方未已喜而賦此

笑當年柏臺蘭省四時風景孤負歸來幸得身無事底
又匆匆朝暮心口語是傳癖詩癮常把芳辰誤夜來風

雨早練帨雲飄紅衣霞捲香滴翠杯露
司花手無限
芳妍留住凝粧為我延佇姑仙綽約如冰雪次第相從
微步天不妬便失却東隅儘有桑榆路人間塵土看太
華峰頭花開千丈吾老尚能去

九

明初賦摸魚子壽余既次其韻而可行
塘成和之成什衰病技癢亦足為十首

買陂塘旋栽楊柳歸來此是先務它鄉故里都休校舊
雨不如今雨鴻在渚笑爾尚南飛吾已安孤嶼黃花解
語道人老宜秋身安耐酒此正有真趣
鑾坡路大手

深慚自許超騰又悖鍾呂但求閒淡如元亮却恨詩多
奇句傾綠醕底須按樂天池上霓裳譜休論往古有三
日重陽約君同醉老子築西園

十

買陂塘旋栽楊柳閒官宜治閒務老天助我攻清淡兩
月不遭泥雨規則渚更累土為山留土分為嶼鄉人共
語歎百歲煙蕪一朝疏闢此去日成趣江湖願自是
平生心許元英誰羨陳呂石渠細流鳴琴筑清似我家

詩句杯引醕便收拾松風寫入絲桐譜區區學古愧竊
祿無功投閒有分猶患不如園

十一

買陂塘旋栽楊柳年來於此承務涼臺燠館吾何有聊
芘一時風雨洲映渚向一片烟波鼎峙嵯峨嶼盤空硬
語挽三峽詞源千軍筆陣不盡樂閒趣當年志為國
微軀曾許青雲仍際觀呂從知弱步難勝重夢斷九天
臚句時飲醕趁四序栽花綴作園池譜長歌弔古悵

安得良田茫茫萬頃種玉闌玄圃

十二

買陂塘旋栽楊柳田園忙勝官務放魚種藕常無暇移
竹又當新雨由近渚駕一葉扁舟時復還吾嶼花香鳥
語況心上無營眼前多景絃外有琴趣尊壘小能費
人間幾許荷香惟欠仙呂天光雲影清難寫盡日掀鬚
無句池作醕要醉上通明傳取釣天譜西山翠古任列
壑爭譏攢峰竦誚難及野人圃

十三

買陂塘旋栽楊柳塵凡皆與停務半生醉夢人間世翻
覆幾回雲雨歸有渚似真到三山縹緲紅雲嶼忘懷笑
語任白鷺驚飛蒼苔不掃此去便無趣斜川路宇宙
茫茫何許綺園肯附諸呂悠然一見南山後便覺世多
塵句持此醕論心事中間異姓還同譜迂踈好古因藝
菊栽松滋蘭植蕙荒了種瓜圃

十四

買陂塘旋栽楊柳散人不理他務柳栽近水先應綠底
用等閒霖雨遵北渚看雙檣盤空倒影揉烟嶼千言萬
語只今日投簪經年閉戶便自得天趣 真男子報國
誰如張許論交仍負嵇呂我今但要閒陶寫幸免鏤章
雕句村甕醕此真是交梨火棗傳家譜庭樹空古有野
鶴時來衡門不鎖清徹地仙圃

十五

買陂塘旋栽楊柳歸農未免多務一亭四序饒風景且

說夜來春雨香濕渚愛新樹依稀數影連三嶼黃鸝不
語怕曲几團蒲坐忘方定驚破靜中趣功名事却笑
平生自許誰調陽律陰呂而今且向東君問舊句豈如
新句開牖醕要醉喚石湖重緝寒梅譜榮枯自古起九
十韶華六旬餘力終日醉吾圃

十六

買陂塘旋栽楊柳清風淨掃塵務柳陰已見疎成密又
聽綠荷敲雨鷗戲渚奈倏爾翻飛飛過佳處嶼形神自

語豈世事相縈機心未息物我不同趣
池亭小收歛
風烟來許漁歌何愧鍾呂水紋瓦影相娛悅高詠退之
佳句荷酌醕有一曲滄浪不犯人間譜悠悠振古問誰
似吾儕攻迂習淡為水廢場圃

十七

買陂塘旋栽楊柳眼中已辨歸務柳成修幹蓮成實均
沐老天恩雨憐小渚敢氣象侵陵海上紅雲嶼神仙有
語任涓滴蹄涔茫洋鯨浪各自適歸趣
星星鬢鏡裏

衰容如許西風又動商呂九原宋玉悲何及付與短歌
長句飄汎醕縱不到箕山也是魯通譜由今視古看畫
錦堂前霜天老月千載照韓圃

十八

買陂塘旋栽楊柳田家小小成務一年清景君須記大
勝草烟花雨冰泮渚把一片玻璃圍護瓊瑤喚鉤簾獨
語是天富吾家地輸清供種種出奇趣 桑榆樂造物
而今已許一竿自惜歸呂圭塘款乃烟波曲却屬腐儒

章句尊有醕是波也神湯世與詩同譜誰能復古且池
上觀梅爐中煨芋燈下治書圃

水龍吟

過黃河

濁波浩浩東傾今來古往無終極經天亘地滔滔流出
崑崙東北神浪狂飈奔騰觸裂轟雷沃日看中原形勝
千年王氣雄壯勢隆今昔鼓枻茫茫萬里棹歌聲響
凝空碧壯遊汗漫山川綿邈飄飄吟跡我欲乘槎直窮
銀漢問津深處入喚君平一笑誰誇漢客取支機石

二 題賈氏白雲樓次牧菴韻

結樓高倚晴空人，間何限思親處。
白雲誰遣等閒出，岫悠悠來去。
本是無心寧知下土有人延佇。
悵荒烟衰草九原難作空目。
斷邱陵樹見說大鵬變化，趁扶搖又搏雲路。
朱簾畫棟關山綿邈，夢魂良苦。
兩字行藏百年忠孝，致君榮祖，待更區屏翳，溥為霖雨，繼商家傳。

三 至順癸酉九日秋興亭賦

一亭飛出層霄，昔人似為登高辦。
雙眸千里茫茫宇宙。

滔滔江漢一片秋光青山紅樹斷雲斜鴈想人生塵世
難逢開口但醉節何多歎細數年年今日娛清歡半
因羈宦邇來心事無慚猿鶴更齊鵬鷃華髮新添黃花
任笑烏紗頻岸且一尊傾倒不須醉後把茱萸看

四

趙伯寧中丞代祀
淮漕過維揚徵賦

五雲飛出蓬萊天香散滿人間世龍翔鳳翥千齡一遇
明良慶會節鉞重來士民騰喜山川增氣想四方地遠
九重心切都要見問閭事寤寐天顏咫尺裊秋風一

鞭歸騎昔年勲業烏臺倚重紫垣虛位自顧踈庸資身
無策敢論經費但儒酸不改作醢充賦助和羹味

五

喜雨用鄭
彥章韻

四郊禾稼如雲方驚數日甘霖小
吾皇有德老天能事
非因人禱一夜風雷玄雲撩亂銀河傾倒問田家消息
今年氣象更催得秋成早
壓盡東華塵土湛冰壺九
重清曉晴光漸放瀛洲波定御溝聲小綠野春回黃扉
晝靜篆煙縈繞願魚羹有飯避賢歸去向山林老

六

甲申七月廿六日偕王
居仁王仲武小酌洹堂

洹堂半月三來小庭日見添佳致
蒼筤踈瘦黃葵高潔
玉簪清麗林影波光新晴景物嫩涼
天氣對溪山如此
田園歸去除詩酒渾無事
爛漫鄉鄰難忝比當年鼎
烹加味古今都說浮雲春夢功名富貴
何事迷途直臨
老境纔尋平地把塵寰休問菊花行綻
請重來醉

七

次前
韻

此身就健宜閒莫教七十才休致
招讒賈怨聲名烜赫

文章雄麗三紀紅塵一簪華髮消磨豪氣有清泉白石
實聞吾語吾衰矣無多事 世故真如嚼蠟數年來已
知無味尋常有句人為宰相間方是貴洎水秋清無邊
風月無窮天地看奮髯箕踞蒼苔濁酒為青山醉

八

平生人海風波謗書盈篋從文致歸來結構且圖跼伏
敢求華麗朝暮娛人水聲山色柳陰花氣笑彤闥紫闥
浮沉十載更幾載成何事 好是西成咫尺秣田風已

飄香味安排小瓮從今不怕鄰翁酒貴更築詩壇從君
遊刃周旋餘地但有人來問金鑾舊話便昏昏醉

至正集卷七十九

欽定四庫全書

至正集卷八十

元許有壬撰

樂府

念奴嬌

中都送韓岩夫歸大都

南鴻過盡正龍沙歲晚嚴凝時節朔吹翻空沙石走一夜
坤維凍裂宇宙茫茫山川杳杳千里飛陰雪停驂回
顧壯心未信如鐵京國十月先春杏桃無數破煖應

開徹此去佳游知不負醉裏雕鞍南陌糞火爐邊簡書
叢裏肯念飄零落故人欲問此情正待君說

二
賦

螢

更闌人靜正滿天晴露半庭斜月時見飛螢三四點樹
影依稀相隔暗地偷明微形自照冷焰明還滅有時分
亂殘星流下天闕應念造物多情翻騰變化腐草還
成物多少黃萎隨土壤爭似超然飛越我正清貧寒窗
寂寞賴爾成勲業案頭乾死也勝零落霜雪

賀新郎

登滕王閣
用稼軒韻

陳迹空見渚悵繁華等閒一夢便成今古佩玉鳴鑾人
如畫何處為雲為雨只明月還生春浦帝子當時無窮
欲奈浮雲回首渾非故天有意肯輕許 江湖襟帶雄
吳楚更翩翩三王文采儷章駢句一旦飛來韓家筆才
見龍翔鳳舞漫千載懷人延佇豪傑紛紛今誰在笑世
間華屋爭寒暑瀛海遠去無侶

二 次呂叔泰
南城懷古

故壘空如渚杳無蹤朝臺暮榭燕歌趙舞為問人間繁
華夢幾度邯鄲炊黍只燕子春來秋去太液勾陳何由
辨似咸陽一炬成焦土興與廢竟誰主 滿川芳草迷
烟雨悵平生楚騷心事更堪羈旅野水芙蓉香寂寞猶
似當年怨女長嘯罷中天凝佇滄海桑田尋常事附冥
鴻便欲飄飄舉回首後又千古

滿江紅

次湯碧山清溪

木落霜清水底見金陵城郭都莫問南朝興廢人生哀

樂載酒時時尋伴侶倚闌處處皆樓閣對溪雲試放醉
時狂渾如昨沙洲外輕鷗落風帘下扁舟泊更寒波
搖漾綠簑青箬為向九原江總道繁華何似今涼薄怕
素衣京洛染緇塵從新濯

二

次李泌州
見寄韻

徙倚危闌愛四面嵐光翠濕回首見疎雲黃葉遠林平
蹟老眼都迷秋遠近壯遊已徧天南北有一官更比在
家時添幽寂人間世天涯客喚李杜招元白問鳬因

誰損鶴因誰益有酒直須拚醉倒古今長短嗟何極笑
韓非孤憤若為多常填臆

三

同前

一夜繁霜便染得乾坤澄寂秋滿眼蕭蕭雲樹淒淒風
日山色偏供羈旅恨年光肯為英雄息只寒華不減舊
時香天應惜官況薄勞耕織詩律在森戈戟更山城
容我清尊瑤瑟不是皇家勞結網姓名底用人間識喜
使君時有一箋來雲烟濕

四 和郭子敬夏
日村居韻

一曲清溪收拾盡風聲月色還自笑六旬將近數椽方
葺已分封侯非燕領儘教有地爭蝸角算人生難得是
清閒吾今得 離離黍芄芃麥覩此景皆真樂更葵花
未謝榴花仍發繁劇只因詩有債迂疎却喜門無客問
小亭盛暑不容人今秋月

石州慢

次張凝
道韻

足跡塵囂目厭紛華擾擾蜂蝶擊壺未了長歌又聽陽

關三疊平生湖海可憐窄落新豐蓬山回首烟霞隔鵬
鷗不同天任焦明蚊睫愁絕停杯為問羲娥幾度東
生西滅俯仰金臺陳迹千年誰接天空秋老倚闌南北
悠悠暮雲汀樹人長別想見苦吟時滿吳江楓葉

二

送牛農師赴
石州學正

少日襟期不信儒官能把身誤長歌拂袖南來眼底雲
霄平步黃金散盡三千流落京華區區又上并州路官
冷生無羶任虀鹽朝暮今古男兒萬里封侯休嘆雲

萍羈旅我亦倉皇明日携書北去居庸關下蕭蕭風振
析鈴酒醒夢覺君何處畫出斷腸時滿斜陽烟樹

金菊對芙蓉

宿程松壑月
香亭次韻

曉夢初迴餘醒未解月明猶掛疎桐在月香絕頂穩駕
天風喬松勁竹高寒地還容得幾朵芙蓉霜空放眼水
痕褪碧山色添濃 休問衰老詩窮把烟嵐奪取也是
豪雄問今來古往誰異誰同老懷陶寫惟絲竹有捧觴
林下丰容傍人任笑踈狂不減我輩情鍾

齊天樂

天津橋
次韻

深宮傳粉江東主肥鮮養成嬌嫩軟北望中原自分秦
越儘付馬蹂車碾神州天遠笑六代封疆一毫無展更
著荒淫月明瓊樹照同輦長虹誰架千尺要等閒盡
跨人海深淺名襲東都侯封違命贏得興亡流轉年光
冉冉又走馬南來片時宮苑獨依闌干夕陽鴉萬點

滿庭芳

偕啓士安馬明初
登荀和叔廣思樓

沙路無泥柳風如水嫩涼偏入吟鞍廣思樓上雨後看

西山回首炎氛千丈便長嘯跳出塵寰青天外斜陽淡
淡倦鳥竟飛還 郊原秋色裏望窮霄壤倚徧闌干問
神仙何處獨占高寒樓下悠悠洹水為底事不暫休間
吾衰矣休將舊手遮日上長安

二

槐院風清蘚堦塵靜日長鎮掩衡門葛帷藤簟石枕竹
夫人不作南柯癡夢要來往月窟天根花陰轉闌幽
鳥啼破一牕雲 起來盤膝坐松風鼎沸花雪浮春便

洗除胃次多少凝塵更喜秋原有秫快準備小甕清尊
東籬下黃花香裏顛倒白綸巾

三

庚寅正月十六日
夜獨酌戲成韻

學本迂疎才非明哲天恩偶聽歸田良辰美景相遇更
欣然細數人生行止或城市或在林泉都評過忘形適
意惟是在尊前只今頭盡白但憐飲量不似當年甚
藥痰煤渴無事招愆時有親朋來勸學康節微醉為賢
先生笑偶當乘興又作飲中仙

玉燭新

題李伯瞻一
香圖次韻

清風林下寺愛三友聯翻世無能四凌波仙子香魂散
此地是誰招此萬紅千紫惟磬弟梅兄二子堪共領歲
晚高寒來成花部新史佳人玉潔冰清縱彷彿肌膚
異香難似醉吟無次花應笑彼此消融渣滓春空鴈字
不帶到江南情思還自笑今日相看袁家有姊

玉漏遲

同前次張
夢臣韻

雪晴天似水風清月白蕭然三子天巧難名鏤玉鏤冰

無訛却是同心異種解歛聚山林高致誰不喜花中隱
德人間真味 邂逅粲者相逢似瓊珮霓旌九霄飛陸
移入銅瓶付與野人憑几滿意按香嚼藥有濁酒微吟
相繼休喚起明日此觥重洗

望月婆羅門引

借王仁甫左丞賈伯堅左司朝罷
過李廷秀參議因觀藍梅遂成歡

酌廷秀求詞
醉中賦此

紫宸朝罷東風吹到謫仙家
貂裘抖擻塵沙一室牕明
几淨人境獨清華有息齋名畫殿帥高茶
主人意佳

道分手即天涯何事相逢不飲戚戚嗟嗟黃封旋拆有
鵲脂雞胸與鬼羆公不飲辜負梅花

二

雪夜宴沙班良甫家
時為湖南宣慰使

人家十萬春風先到使君家天公更助芳華盡把樓臺
粉澤瓊樹映橫斜要歌宜白雪暖借流霞 吳姬趙娃
亂銀燭影交加不放行雲歸去敲碎紅牙可憐杜老肯
飛送江頭只岸花爭似我夜醉長沙

江城子

次韻

金史卷八十一
卷八十
懶於沙鳥拙於鳩為無求得無憂底事踈狂却效子長
游畢竟無求何用出求不得亦宜休 西風真解釀羈
愁試登樓望南州黃葉踈雲搖蕩一川秋更被誰家多
事笛吹不盡思悠悠

二

飲海子舟中班彦功
招飲斜街以此答之

柳梢烟重滴春嬌傍天橋住蘭橈吹暖香雲何處一聲
簫天上廣寒宮闕近金光朗翠宮晃 誰家花外酒旗
高故相招儘飄搖我政悠然雲水永今朝休道斜街風

物好才去此便塵囂

行香子

同李元鎮晚
酌張氏小閣

碧月香雲小院重門辦詩愁多是黃昏梨花淡淡柳絮
紛紛對古銅爐神品畫靚粧人半醉多羞一笑欺春
有丹青描寫惟真秋波側媚雲岫輕顰是藥珠仙巫峽
女洛川神

鷓鴣天

次韻李沁
州寄酒

滴困檀槽碎玉聲青州合喚沁州名高風未論陶元亮

豪氣應吞阮步兵 明老眼慰浮生人間勢利一毫輕
羈愁如海都消盡細和清歌帶月傾

二

同前

甘滑端能壓蔗漿芳華初不藉山薑可憐太白分餘瀝
遠與文園浣渴腸 青瑣闥白雲鄉百年誰與校閒忙
何如常對松岩老萬事悠悠付一觴

三

縷篆烟消月滿簾青綾香減夜寒尖鵲橋誰駕銀河渡

蚪漏應將海水添 天漠漠恨厭厭不成鴛夢睡空甜
一春多少相思恨瘦得腰肢分外纖

四

伏臘歸寧已愴然 天涯回首路三千倦遊久賦王孫草
寫恨應歌相府蓮 天也老月空圓鐵心難受夜如年
麝媒閒殺春風手想像蟬蛾更可憐

南鄉子

醉書月香
亭桂几

老子分漁樵說著登山氣便豪天外長江流不盡迢迢

脚底青雲步漸高
兩手敢辭勞
右有深杯左有螯
我似淵明多一字
陶陶明日黃花笑二毛

二 贈軋二絃胡琴高才甫

錦瑟思華年底用嘈嘈五十絃
兩線清絲千萬調能傳
句句分明字字圓
高藝擅華筵多少新聲出自然
更著趙娘歌宛轉
相聯消得詩人筆似椽

三

山水綠相紆
好箇依山傍水居
不是隆中高卧處
茅廬

直挽岷峨入壯圖 匡世策全踈只合歸來坐守株鄉
里小兒從笑我非夫却勝携人共泛湖

四

波漾石粼粼浮磬依稀類泗濱回首林慮千萬丈嶙峋
不效脩蛾一點顰 幽討日方親林下何嘗見一人便
把清流都洗盡緇塵領取羲皇以上春

五

次可行
韻二首

薄宦苦營營半世長亭復短亭一旦結茅當疊障雲屏

朝暮陰晴幾樣青
濁酒瓦盆盛農父無才却有情
好雨知時公到此安寧話到盆空月可庭

六

小隱遠民廛草舍三間柳作椽
圍繞佳城才二頃山田便覺胃中綽綽然
世態自爭妍老我壺觴業自專
地濶天寬容醉舞回旋又似偷閒學少年

七

和明初鶴
飢韻四首

浙米劒頭炊枵腹雷鳴出險詩
詩客眼高輕視鶴如鷄

終是鷄羣有等威 供飼不如期奈此瓶儲告盡時也
勝劈琴饒俗子充飢窮餓相從更怨誰

八

沙磔不堪炊華表高歌乞食詩不為咏腥甘趁逐羣鷄
為伴書癡老實威 萬里在襟期會見青雲奮迅時吐
故納新元有術偏飢奉瘞佳名却付誰

九

暑室困蒸炊呼鶴前來聽咏詩鶴告不餐空碌碌隨鷄

諸僕無恩但有威 雲海夙相期忍使清齋十二時主
者不才今遣汝調飢騎去揚州定屬誰

十

塵夢忝方炊白鶴空中漫誦詩飲啄適時爭得似山鷄
敢效妖狐更假威 曾與老仙期衛國遭逢彼一時十
六百年才不食無飢我欲推窮倩阿誰

臨江仙

環江萬梅方吐而予來長沙風
雪十日晴復大霜有懷而作

十日惡風三尺雪繁霜又滿人間梅花誰與問平安玉

肌清似削爭奈許多寒
夢繞琅璫江上路竹籬茅舍
青山莫教芳酒滯歸鞍黃昏無限月待我倚闌干

踏莎行

贈相士

黃鶴樓前胭脂山上敲門有客來相訪自言閱遍世間
人要觀塵俗酸寒狀關塞冰霜江湖風浪歸來幸得
身無恙君言雖應我方慚山中道士何勞相

至正集卷八十

欽定四庫全書

至正集卷八十一

元 許有士 撰

樂府

鵲橋仙

同李雲松宣慰過思齋宣慰值出書其壁

雲松仙客箕山道士來訪思齋老子思齋何處未歸來
想只在翠紅鄉裏風清月白橙黃鱗紫一巷笙歌紛
起良宵不遇負佳賓都不念人生有幾

二 贈可
行弟

花香滿院花陰滿地夜靜月明風細南坡一室小如舟
都歛盡山林清致竹簾半捲柴門不閉好箇暮春天
氣長安多少曉鷄聲不到江南春睡

三 贈相師
周可山

春秋七十江湖萬里老子閱人多矣兩朝名勝一囊詩
道渾似當時袁李紅塵陌上白雲堆裏擾擾浮生行
止我非燕頷虎頭人但詩聖酒狂而已

四 宴胡安常
侍御家

清香華屋黃葵紅葉正是新涼時節文園久病不勝杯
辜負殺一庭秋色 珍般紛錯玉醅芳烈醉倒江湖狂
客涼天佳月即中秋更有箇今年閏月

五

心閒勝貴身閒勝富已往而今始悟來言精力未宜閒
此俗子便宜推去 秋風鷄黍春山杖屨盡是幽人樂
處儘教鬢雪飄蕭總不礙銜杯琢句

蝶戀花

九陌十門新雨後。細染穠薰滿目春如繡。恰信東君神
妙手。一宵綠徧官橋柳。樓下蘭舟樓上酒。沙暖蘋香渾
似來時候。說與可人知。信否傷春更比悲秋瘦。

二

以變白方
贈朱亮卿

聞道卿卿倂憊損。花落深閨無限傷春恨。天上靈方吾
不靳。為君細染三生鬢。鑷白從今閒玉笋。坐看丰姿
潦倒還髻亂。洞裏桃花應錯認。劉郎乃爾添風韻。

三

一片白雲迷楚岫風捲青秧迤邐波紋皺馬上推敲詩
未就回頭不覺雙山猴漁父樵翁常邂逅問我何求
無事空奔走我固蒼黃慚二叟少年有志還知否

四

萬象森森天漠漠吹徹殘更聲咽梅花角牕外月明無
處著暗螢沾露隨風落夢裏詩成渾忘却起傍屏山
涼透紗厨薄靜中悠然心自樂蓬山不用乘黃鶴

五

丁亥正月十三日
親朋治具醉中賦

老子行年過耳順蓬鬢蕭疎人道猶風韻
領畧風光元有分賞心又喜燒燈近
薄雪初消寒欲盡詞館久閒時得陪英俊
莫訝連朝為酒困東君已是傳花信

漁家傲

訪畢雪
巫不遇

木落寒林山骨瘦湘江風細波紋皺
何處携琴何處酒惆悵久亂鴉啼斷烟中柳
茅屋蕭蕭連甕牖半簷寒旭閒清晝
歸路梅花香滿袖詩未就青山笑我空回首

二 歌圭塘四
時四首

冰盡泉香雲縹緲
韶華隱隱浮林杪
酒在葫蘆魚在沼
清晝悄好音時復來黃鳥
管領風光心未老
衰顏却怕清波照
有酒可斟魚可釣
能事了東風一曲漁家傲

三

窻影脩篁搖翠葆
牆陰幽徑連芳草
驀地雨來荷葉鬧
香更好亂煙浮動紅雲島
稚柳千條絲嫋嫋
柳邊宜著蘭舟小
世態紛紛何足校
收桂棹鳴鳴且和漁家傲

四

露洗璇穹青杳杳年光紅入灘頭蓼翠蓋撐烟吹半倒
霜信早一奩寒影磨清曉 早是軒扉塵不到好山更
與供登眺酒債積多詩債少翻水調西風幾疊漁家傲

五

落日崇臺寒力峭登臨恰似尋安道有竹何人能徑造
吾不誚相逢要遂掀髯笑 雙檜凌空龍夭矯有知定
訝人枯槁珍重歲寒冰雪操君自寶老夫但和漁家傲

太常引

武昌別墅

胭脂山下老農家看雲樹翠交加香透小窗紗是昨夜
幽蘭放花引泉澆樹破苔移菊更種故侯瓜一笑有
生涯便休嘆清霜鬢華

二

用同年歐陽元功
韻贈相師陳壺秋

年來詩筆尚能神但無奈舊時貧天地一間身且不在
青雲後塵壺秋眸子野人心事相對好數陳山酒正
清醇要茅屋朝朝是春

三

速可行
治具

小齋瀟灑頗宜貧
清有竹靜無塵
俗子不敲門
只風月
烟霞是隣
古瓶清雅寒梅疎
瘦昨雨忽紛紛
尚有一枝春
快報與南廳主人

四

同前

忍寒搜句意何如
政因我腹焦
枯茶竈火慵噓
高陽侶
元非姓盧
佳章聯疊新
酷寥落飛夢繞
兵厨新釀取
來無要親與梅花餞
逢

五

至正辛未春環樞堂海棠開偕馮公勵參議陪
紫清真真人飲其下今年范發事務方殷欲尋

舊盟跬步牽繁堂西漱芳亭梵方池種芙蓉連
歲約觀而皆不果六月初日禱雨一過則紅衣

落盡翠房森矗矣口占
長短句奉紫清一笑

漱芳亭下小方塘清散水芝香回首翠成房忍不待佳
人奉觴紫垣朝暮紅塵車騎遮斷白雲鄉老我重尋
芳又渾似今年海棠

六

次王居仁
為壽韻

進為卿相退為仙歎今古少能全拋却祖生鞭且占取

烟霞洞天 逸峰
卷畫清流漱玉故里好山川黃菊正
鮮妍便沽酒休論幾千

七

登樓
觀柳

雪消春氣怡和柔先到柳梢頭數日不登樓笑青眼窺
人尚羞 清明近也老夫耄矣其忍負歡游飛絮便生
愁儘都變浮萍去休

八
烏克莊杜德常寓所二松
可愛醉中賦此以贈二君

二松如蓋偃中庭向朱夏作秋聲搖影動踈樗掩映得

苔痕轉青 西清博士西臺御史相對又雙清咫尺到蓬瀛休認作藍田縣丞

九

丙戌次舊韻
寄紫青真人

道宮城市勝林塘松竹滿芰荷香煮酒出丹房記相見忽忽一觴雲萍飄忽仙凡懸絕翻手又殊鄉何日漱餘芳看華髮詩人許棠

十

再用舊韻
寄紫清

詩成春草夢池塘相憶託玄香常記飲仙房笑一舉曾

蒙十觴 百年行止幾番離
合吾老且吾鄉聊與領羣
芳漸開到江頭野棠

十一

圭塘
四首

圭塘種藕已多時貼水曉星稀
生意一朝回便萬柄紅
酣綠欹連宵驟雨透空繁響清
絕不容詩對境寓襟
期要無愧鴟夷子皮

十二

幽人早起赴池亭看初日照娉婷
風蓋露珠傾又勝似

前時雨聲 水沉鄉裏錦雲深處雙檣插天青一葉釣
舟輕似野渡無人自橫

十三

四堤楊柳接松筠香破水芝新羅襪不生塵笑畫裏凌
波未真 紅雲飄渺清風蕭颯半醉岸烏巾不是葛天
民也做得江湖散人

十四

雲舒霞捲萬粧濃倒影水天紅池轉小臺東又一種娟

娟玉容 仙肌綽約奇芳清遠浮動水晶宮一笑對衰
翁好同赴廬山社中

清平樂

登北山閣
感懷賦

鍾山高處又結層樓住山自蒼蒼江自去萬景一時收
聚平生湖海詩豪更傾五斗香醪不信人間好句不
教驅入霜毫

二

瓶梅

膽瓶溫水一握春如洗斗帳怯寒呼不起嬌滴粉雲香

裏誰教淺笑輕顰恰如鏡裏傳神不用瑤天雪月
眼前瓊樹常新

三
避暑神仙
詠桂樹

堂前雙桂雲潑交加翠天老金柔花尚未且愛清陰滿
地秋風一旦花開天香吹散亭臺却被花神見笑先
生未必能來

四
和可行梅
竹韻二首

平生愛竹到處縈心曲一日相違人便俗栽滿水邊茅

屋誰知歲晚空山佳人能慰荒寒莫論和羹結實且
看高節停鸞

五

賞梅觀竹不暇鏡黃獨白玉吹香連碧玉富殺山人林
谷幾年行路艱難眼明今日重看便結歲寒心友休
教夢到槐安

六

天寒日暮百繞梅花樹萬斛清香藏不住都在一花開

處 可憐月墮霜飛不知踈影來時誰報雲川老子翠
禽先在南枝

七 題郭思誠山居

西巖仙老身在蓬萊島竹月松雲塵不到況有清風自
掃 霜溪淺碧搖沙烟村落照明霞說與門前鷗鷺仙
家又是漁家

憶秦娥 和希孟張中丞韻

山人笑人間不識山間妙山間妙嵐光浮動半江殘照

移文莫待山英校烟霞曾結三生好三生好白雲深
鎖葛洪丹竈

二

山瓢飲太空為幕雲為枕松聲萬壑月明風冷
人生未老宜先省塵寰儘有清閒境清閒境孤雲野
鶴香無蹤影

三

山花舞巖姿能笑禽能語禽能語百年心事一犁春雨

神仙護短多官府老人只解為農圃為農圃乾坤休
問幾番今古

四

山鷄唱少年中夜心悲壯心悲壯世間何事不來眉上
迷途未遠奚惆悵五湖烟水春搖蕩春搖蕩誰知平
地怕天風浪

五

送牛農
師二首

春山碧詩成馬上應相憶應相憶盧溝橋畔晚雲如織

人生有別休多惜但悲後會知何日知何日暮雲心緒斷鴻消息

六

長安陌東風楊柳花如雪花如雪青條無數為君攀折
少年剛道輕離別臨歧未信心如鐵心如鐵舊懷新恨滿梁殘月

菩薩蠻

寄都下友人

憑高日望金臺路黃沙盡處空烟樹歲晚足蕭疎雁聲

無夜無 簿書臨俗態人道儒酸在何以慰相思半年
無好詩

二

宿造口用
稼軒韻

月明江濶天如水夜深殘燭縱橫泪底事不求安世間
多好山 一杯君且住萬里人南去倡汝莫要予山寒
無鷓鴣

三

寄中書
諸公

三司笑面鞞紋皺嗟官憔悴非詩瘦紅袖寫烏絲誰曾

夢見之 淮鹽真是白染得須成雪何處有神仙能教
白復玄

浣溪沙

脩黛橫愁苦愛顰頰霞亂玉更宜嗔嗅香按藥奈何春
織就回文難會意寫成離字亦傷神他年不及卷中
人

二

花露濃沾桂棹香柳風輕拂葛衣涼放歌深入水雲鄉

荷葉杯中傾綠醕
瓜皮船上載紅粧
都堂何似住溪堂

三游善應

崖上留題破紫烟
巖前瀹茗挹清泉
爛游三日酒如川

有水有山高士宅
無風無雨小春天
人間真見地行仙

點絳脣

病中偶成

酒病詩愁好春三月
常辜負開門春暮
新綠迷雲樹一

片飛花綰住游絲舞東風妬等閒吹去散亂隨紅雨

二

次呂叔
泰韻

雲海茫茫何人尋得春歸處年年遲暮不遂春歸去何
日真歸歷歷江湖路舟橫渡青山無數醉吸荷心露

如夢令

牆角黃葵都謝開到玉簪花也老子恰知秋風露一庭
清夜瀟瀟洒瀟洒高卧碧紗窻下

二

為問蕃釐道士今日瓊花開未老子偶然閒要向花間
游戲游戲莫待清陰滿地

三

饒德明學士收疎
齋詠竹二首求和

誰把清風領受尋得歲寒三友霜月玉亭亭恰似老夫
詩瘦詩瘦詩瘦無奈碧雲懷舊

四

歲暮天寒時節滿意相看冰雪不遣野人歸誰慰此中
清絕清絕清絕天上一方明月

五

桃李東風不耐好在西山如黛策馬看山來政爾青青
相待無奈無奈却被暮雲妨礙

六

一片蒼苔鑿破百折清泉分過長日午陰圓自挈胡床
來坐斯可斯可從此閒身屬我

七

昨夜庭梧墮翠詩思尤便爽氣無事要生悲可笑宋家

多事衰矣衰矣但校隣翁酒味

八

火榻只疑春早紙帳不知天曉枕上問山童門外雪深
多少休掃休掃收拾老夫茶竈

九

次郭子敬
韻四首

三日瓊瑤飛灑天巧豈容摹寫佳客不魯未有酒定從
誰把文雅文雅應笑珉多玉寡

十

老子風神清灑好句自然傳寫立雪賦梅花更折綠條
成把閒雅間雅莫道吉人辭寡

十一


門外雪花飄灑坐上烏絲方寫秋露白泠泠更著玉人
親把三雅三雅取醉莫論多寡

十二

有淚綠窻偷灑有恨錦箋難寫消瘦不勝春玉骨都無
一把風雅風雅正值文君新寡

長相思

夢揚州到揚州明月長街十二樓珠簾不上鉤
為誰憂為誰愁愁得春風人白頭見花應自羞



至正集卷八十一

元史許文忠公列傳

許有壬字可用其先世居潁後徙湯陰有壬幼潁悟讀
書一日五行嘗閱衡州淨居院碑文近千言一覽輒背
誦無遺年二十暢師文薦入翰林不報授開寧路儒學
正陞教授未上辟山北廉訪司掌書登延祐二年進士
第授同知遼州事會關中有警鄰州聽民出避棄孩嬰
滿道有壬獨率弓箭手閉城門以守卒獲無虞州有追
逮不許胥隸足跡至村疇唯給信牌令執里役者呼之

民安而事集右族貪虐者懲之冤獄雖有成案皆平翻而釋其罪州遂大治六年己未除山北廉訪司經歷至治元年遷吏部主事二年轉江南行臺監察御史行部廣東以貪墨劾罷廉訪副使哈只蔡衍至江西會廉訪使苗好謙監焚昏鈔檢視鈔者日至百餘人好謙恐其有弊痛鞭之人畏罪率剔真為偽以迎其意寔庫吏而下撈掠無全膚近莫能償有士覆視之率真物也遂釋之凡勢官豪民人畏之如虎狼者有士遂擒治以法部

內肅然召拜監察御史八月英宗暴崩於南坡賊臣特克實遣使者自上京至封府庫收百官印有壬知事急即往告御史中丞董守庸守庸謂宮禁事非子所當問有壬即疏守庸及經歷多爾濟巴勒監察御史郭額森呼圖克阿附特克實之罪以俟十月特克實伏誅泰定帝發上都御史大夫聶赫先還京師有壬即袖疏上之及帝至復上章言特們德爾之子索諾木與聞大逆乞賜典刑其兄弟勿令出入宮禁中書平章政事王毅右

丞高昉橫罹奪爵而四川行省平章政事趙世延受禍尤慘皆請雪寃復職繼上正始十事一曰輔翼太子宜先訓導二曰遴選長官宜先培養三曰通籍宮禁宜別貴賤四曰欲謹兵權宜削兼領五曰武備廢弛宜加修飭六曰賊臣妻妾宜禁勢官徵索七曰前赦權以止變宜再詔以正名八曰特們德爾諸子宜籍沒以懲惡九曰考驗經費以減民賦十曰樽節浮蠹以紓國用帝多從之泰定元年
初立詹事院選為中議改中書左司員外郎京畿饑有

士請賑之同列讓曰子言固善其如虧國何有士曰不然民本也不虧民顧豈虧國耶卒白於丞相發糧四十萬斛濟之民賴以活者甚衆國家舊法每以積分次第貢以出官執政用監丞張起巖議欲廢之而以推擇德行為務有士折之曰積分雖未盡善然可得博學能文之士若曰惟德行之擇其名固佳恐皆厚貌深情專意外飾或惜不能識丁矣議久不決三年六月陞右司郎中其事遂行已而復寢獲盜例有賞論者多疑其偽有

淹四十餘年羣訴於馬首有士曰盜賊方熾求疵太甚
緩急何以使人但經部使者覆覈者皆予官俄移左司
郎中每遇公議有士屢爭事得失汎掃積滯幾無留牘
都事宋本退語人曰此貞觀開元間議事也明年丁父
憂天曆三年擢兩淮都轉鹽運使先是鹽法壞廷議非
有士不能集事故有是命有士詢究弊端立法而通融
之國課遂登至順二年二月召參議中書省事未幾以
丁母憂去元統元年復以參議召明年甲戌拜治書侍

御史轉奎章閣學士院侍書學士仍治臺事會福達魯
噶齊旺布籍丞相勢宿衛東宮其行頗淫穢御史劾之
旺布藏御史大夫家有士捕而遣之九月拜中書參知
政事知經筵事帝詔羣臣議上皇太后尊號為太皇太
后有士曰皇上於皇太后母子也若加太皇太后則為
孫矣非禮也衆弗之從有士曰今制封贈祖父母降於
父母一等蓋推恩之法近重而遠輕今尊皇太后為太
皇太后是推而遠之乃反輕矣豈所謂尊之者耶弗之

聽中書平章政事察爾特穆爾挾私憾奏罷進士科有
壬廷爭甚苦不能奪遂稱疾在告帝強起之拜侍御史
會汝寧捧胡反大臣有忌漢官者取賊所造旗幟及偽
宣勅班地上問曰此欲何為耶意漢官諱言反將以罪
中之有壬曰此曹建年號稱李老君太子部署士卒以
敵官軍其反狀甚明尚何言其語遂塞廷議欲行古剽
法立行樞密院禁漢人南人勿學蒙古輝和爾字書有
壬皆爭止之重紀至元初長蘆韓公溥因家藏兵器遂

起大獄株連臺若省多以賊敗獨無有壬名由是忌者
益甚有壬度不可留遂歸彰德已而南遊湘漢間至元
六年召入中書仍為參知政事明年改元至正有壬極
論帝當親祠太廟母后虛位徽政院當罷改元命相當
合為一詔冗職當沙汰錢糧當裁節如此之類不一而
足人皆韙之轉中書左丞二年囊加慶喜八及博囉特
穆爾獻議開西山金口導渾河踰京城達通州以通漕
運丞相托克托主之甚力有壬曰渾河之水湍悍易決而

足以為害淤淺易塞而不可行舟況地勢高下甚有不
同徒勞民費財耳不聽後卒如有士言先是有士之父
熙載仕長沙日設義學訓諸生既歿而諸生思之為立
東岡書院朝廷賜額設官以為育才之地南臺監察御
史茂布喇實緣睚眦怨言書院不當立并構浮辭誣讟
有士并其二弟有儀有孚有士遂稱病歸四年改浙江
行省左丞辭六年召為翰林學士既上又辭監察御史
累章辨其誣俄拜浙西廉訪使未上復以翰林學士承

旨召仍知經筵事明年夏授御史中丞賜白玉束帶及御衣一襲未幾復以病歸監察御史達蘭布哈銜有士時長短之奏劾甚力事尋白十二年盜起河南聲撼河朔間有士畫備禦之策十五條以授郡將民藉以安十三年起拜河南行省左丞朝廷遣將出征環河南境連營以百數一切芻餉皆仰給之有士從容集事若平時然十五年遷集賢大學士尋改樞密副使復拜中書左丞時以言為諱有士力言朝廷務行姑息之政賞重罰

輕故將士貪掠子女玉帛而無鬪志遂倡招降之策言
多不載有僧名開自高郵來言張士誠乞降衆幸事且
成皆大喜有士獨疑其妄呼僧詰之果語塞不能對轉
集賢大學士兼太子左諭德階至光祿大夫有士前朝
舊德太子頗敬禮之一日入見方臂鵞禽以為樂遽呼
左右屏去十七年以老病力乞致其事久之始得請給
俸賜以終其身二十四年九月二十一日卒年七十八
有士歷事七朝垂五十年遇國家大事無不盡言皆一

根至理而曲盡人情當權臣恣睢之時稍忤意輒誅竄
隨之有士絕不為巧避計事有不便明辨力諍不知有
死生利害君子多之有士善筆札工詞章歐陽玄序其
文謂其雄渾閎雋湧如層瀾迫而求之則淵靚深實蓋
深許之也所著有至正集若干卷諡曰文忠子一人曰
楨

